



LAPORAN LIPUTAN MEDIA

SELASA / 19 DISEMBER 2023

- 1. MADA SUDAH TUAI PADI – HARIAN METRO**
- 2. GANGGUAN BERAS MASIH BERLAKU – KOSMO**
- 3. TUAIAN PADI HUJUNG TAHUN REDAKAN ISU KEKURANGAN BEKALAN BERAS – BERITA HARIAN**
- 4. ISU BEKALAN BERAS TEMPATAN MAKIN REDA – SINAR HARIAN**

DISEDIAKAN OLEH:

CAWANGAN KOMUNIKASI KORPORAT (MADA)

KERATAN AKHBAR : HARIAN METRO

TARIKH : 19 DISEMBER 2023

PERKARA : ISU SEMASA

Oleh Mahani Ishak
am@hmetro.com.my

Kuala Lumpur

Mada sudah tuai padi

Isu kekurangan beras putih tempatan makin reda: Mohamad

Isu kekurangan beras putih tempatan (BPT) ketika ini semakin reda melalui hasil tuai padi hujung tahun oleh Lembaga Kemajuan Pertanian Muda (Mada).

Bagaimanapun, Menteri Pertanian dan Keterjaminan Makanan Datuk Seri Mohamad Sabu menegaskan, penyelesaian masalah itu sedang giat dilakukan bagi memastikan bekalan mencukupi untuk pasaran tempatan.

"Isu ini reda, cuma sekarang punca beras kita tidak mencukupi kerana tahap sara diri (SSL) negara baru 65 peratus dan masih 35 peratus lagi belum mencukupi.

"Difahamkan, Mada baru saja tuai padi, proses seterusnya menjemur, mengilang sebelum beras teredla di dalam pasaran," ka-

tanya.

Beliau berkata demikian selepas menyempurnakan Lawatan Kerja ke Kebun Komuniti AU2 Taman Keramat, di sini.

Kementerian Pertanian dan Keterjaminan Makanan (KPKM) sebelum ini mendapati, kekurangan BPT dalam pasaran berpunca daripada pembelian panik dicetuskan sebuah video yang menyebarkan berita palsu bekalan beras jenis itu bakal kehabisan.

Selain itu, kementerian juga mengesan trend pengguna yang terpaksa beralih daripada membeli beras putih import (BPI) kepada BPT, ekoran berlaku kenaikan harga mendadak disebabkan tindakan India menghentikan eksport bahan mentah itu.



MOHAMAD melakukan simbolik menuai padi pada Majlis Tuai Padi Bersama Menteri Pertanian dan Keterjaminan Makanan dan Lawatan Kerja sempena Program Lestari Alam Sekitar di Kelah Kebun Rumah Pangsa AU2, Taman Keramat, semalam.

Situasi itu mendorong pengguna 'menyerbu' pasar raya mahupun kedai runcit untuk membeli BPT lebih banyak daripada biasa.

Mohamad berkata, isu sekuriti makanan tidak akan berkesudahan termasuk isu ayam, telur dan mungkin selepas ini, mungkin berlaku isu kekurangan bawang.

"Masalah membabitkan makanan ini tidak akan berkesudahan.

"Misalnya, BFT sekarang ini menjadi rebutan kerana beras import mengalami kenaikan harga," katanya.

Dalam perkembangan berkaitan, beliau menggalakkan persatuan penduduk memohon Dana Komuniti Madani berjumlah RM1 bilion yang diperuntukkan di bawah Jabatan Perdana Menteri.

KERATAN AKHBAR : KOSMO
TARIKH : 19 DISEMBER 2023
PERKARA : ISU SEMASA

Masalah bekalan makin berkurangan di seluruh negara

Gangguan beras masih berlaku

Oleh ZULKIFLI MANZOR

KUALA LUMPUR – Menteri Pertanian dan Keterjaminan Makanan, Datuk Seri Mohamad Sabu mengakui masih terdapat gangguan dalam bekalan beras tempatan.

Bagaimanapun, beliau menjelaskan permasalahan itu sudah semakin berkurangan dan pihaknya sedang berusaha memastikan bekalan beras tempatan mencukupi.

"Masih ada (gangguan), tetapi reda sekarang tapi masih (ada) lagi... Kita sedang usaha cukupkan, yang tuai baru ini masih dalam proses pengilangan. Jadi sekarang baru reda."

"Reda (isu) beras, ayam, telur, (nanti) masalah bawang pula. Beras kita hanya 65 peratus, kita tidak cukup 35 peratus maka sentiasa ada perkara-perkara itu."

"Beras tempatan jadi rebutan sebab harga beras import mahal,"



MASALAH bekalan beras tempatan masih berlaku tetapi sudah semakin berkurangan. – GAMBAR HIASAN

katanya ketika ditemui pemberita selepas melawat Projek Kebun Rumah Pangsa AU2 di Taman Keramat dekat sini semalam.

Beliau berkata demikian apabila ditanya pemberita mengenai dakwaan berlaku gangguan bekalan beras tempatan di pasaran ketika ini.

Sebelum ini media melaporkan, bekalan beras putih tempatan kurang di pasaran ekoran ramai pengguna beras import beralih untuk menggunakan bahan makanan itu disebabkan kenaikan harga global.

Masalah yang berlarutan sejak September lalu itu mengakibatkan sebahagian peniaga terpaksa menaikkan harga dan mencatu jualan hingga menjejaskan bekalan isi rumah.

Untuk rekod, Malaysia memerlukan 2.68 juta tan beras setahun di mana 1.11 juta tan adalah beras import.

KERATAN AKHBAR : BERITA HARIAN
TARIKH : 19 DISEMBER 2023
PERKARA : ISU SEMASA

Tuaian padi hujung tahun redakan isu kekurangan bekalan beras

Kuala Lumpur: Tuaian padi hujung tahun oleh Lembaga Kemajuan Pertanian Muda (MADA) sudah meredakan bekalan beras putih tempatan.

Menteri Pertanian dan Keterjaminan Makanan, Datuk Seri Mohamad Sabu, berkata beras tempatan semakin mendapat permintaan penduduk negara ini berikutan kenaikan harga beras import hingga timbul pembelian panik baru-baru ini.

Katanya, penyelesaian itu kekurangan beras tempatan sedang dilakukan bagi memastikan bekalan mencukupi untuk sepanjang masa.

"Isu ini reda, cuma sekarang punca beras kita tidak mencukupi kerana tahap sara diri negara baru 65 peratus dan masih 35 peratus lagi belum mencukupi.

"Difahamkan MADA baru tuai padi. Proses seterusnya menjemur, mengilang sebelum beras tersedia di pasaran," katanya.

Beliau berkata demikian selepas menyempurnakan Lawatan Kerja ke Kebun Komuniti AU2 Taman Keramat di sini, semalam.

Kementerian Pertanian dan Keterjaminan Makanan mengesan tren pengguna beralih daripada membeli beras import kepada beras tempatan disebabkan India menghentikan eksport.

Mohamad berkata, isu keterjaminan makanan tidak akan berkesudahan termasuk bekalan ayam, telur dan mungkin selepas ini mungkin berlaku kekurangan bawang.

"Masalah membabitkan makanan ini tidak akan berkesudahan dan bekalan beras masih ada gangguan," katanya.

Dalam perkembangan berkaitan, beliau menggalakkan persatuan penduduk memohon Dana Komuniti MADANI berjumlah RMI bilion di bawah Jabatan Perdana Menteri.

"Kerajaan sudah sediakan peruntukan itu. Jadi, kena mohon awal kerana ia boleh dimanfaatkan mulai bulan depan.

"Ia bergantung kepada kawasan Parlimen. Kalau Parlimen tidak mohon seperti Parlimen Bukit Bintang tidak ada kawasan lapang, mungkin peruntukan itu boleh dimanfaatkan Parlimen lain," katanya.

Pada 25 November lalu, Perdana Menteri, Datuk Seri Anwar Ibrahim mengumumkan peruntukan RMI bilion merancang lagi ekonomi di peringkat desa.

Ditanya mengenai peruntukan di bawah kementeriannya, beliau menjelaskan, kementerian itu mempunyai peruntukan di bawah program keterjaminan makanan sebanyak RM400 juta.

KERATAN AKHBAR : SINAR HARIAN
TARIKH : 19 DISEMBER 2023
PERKARA : ISU SEMASA

Isu bekalan beras tempatan makin reda

Tuaian padi sedia ada sedang dalam proses pengilangan dan tanam semula

Oleh **NORAFIZA JAAFAR**
KUALA LUMPUR

Isu beras tempatan semakin reda melalui langkah yang diambil kerajaan bagi membolehkan bekalan itu cukup.

Menteri Pertanian dan Keterjaminan Makanan, Datuk Seri Mohamad Sabu berkata, tuaian padi sedia ada sedang dalam proses pengilangan disusuli penanaman semula.

"Isu bekalan masih ada tapi semakin reda. Cuma sekarang punca beras kita tidak mencukupi kerana tahap sara diri (SSL) negara baru 65 peratus dan masih 35 peratus lagi belum mencukupi.

"Difahamkan MADA (Lem-



Beras tempatan menjadi rebutan disebabkan beras import mahal.

baga Kemajuan Pertanian Muda) baru saja tuai padi, proses seterusnya menjemur, mengilang sebelum beras tersedia di pasaran," katanya pada Isnin.

Dalam pada itu, beliau berkata, isu bekalan makanan sentiasa ada seperti 'yaumulkiamah' yang tiada berkesudahan.

"Beras tempatan jadi rebutan disebabkan beras import mahal.

"Reda beras, ayam, telur, timbul masalah bawang pula. Masalah makanan ini yaumulkiamah.. pasti akan ada," katanya.

Kementerian Pertanian dan Keterjaminan Makanan (KPKM) sebelum ini mendapati kekurangan beras putih tempatan (BPT) dalam pasaran negara berpunca daripada pembelian panik dalam kalangan pengguna.

Ia juga disebabkan trend pengguna yang terpaksa beralih daripada membeli beras putih import (BPI) kepada BPT ekoran berlaku kenaikan harga mendadak disebabkan tindakan India menghentikan eksport bahan mentah itu.